

阿彌陀佛聖典



宁海大悲淨苑 印贈

阿彌陀佛聖典

目 录

阿弥陀佛圣典排印流通序·····	(1)
阿弥陀佛圣典序·····	(4)
一、赞叹归敬章·····	(7)
二、如来因行章·····	(21)
三、弘誓本愿章·····	(40)
四、果地殊胜章·····	(46)
五、发愿生西章·····	(62)
六、修行法门章·····	(75)
七、秘密修持章·····	(99)
八、往生见佛章·····	(129)
九、劝修净业章·····	(143)
十、劝持圣教章·····	(155)

阿弥陀佛圣典排印流通序

念佛一法。乃佛教之总持法门。但有专念自佛。专念他佛。兼念自他佛之不同。专念自佛者。如诸经中。深穷实相。以期悟证。乃於五阴。六入。十二处。十八界。七大等诸法中。以般若智照。了达此一切法。当体全空。亲见本具妙真如性。及禅宗看念佛的是谁。并各种话头。以期亲见父母未生前本来面目者是。此於四种念佛中、名为实相念佛焉。专念他佛。有三种念法。一观想。谓依十六观经作观。或专观白毫。或但观丈六八尺之佛身。或观广大法身。及具观十六种观。二观像。谓对佛形像。想佛相好光明等。三持名。谓一心称念阿弥陀佛圣号。此三种念佛、法虽不同。皆需俱有真信切愿。方可与佛感应道交。方可决定现生出此娑婆。生彼极乐。此四种念佛。唯实相念佛。谛理最深。然颇不易修。以唯仗自己戒定慧。及参究照察之力。别无他力补助。若非宿根成熟。则悟尚不易。何况实证。唯持名念佛。下手最易。成功最速。倘能都

摄六根。净念相继。必於现生。亲证念佛三昧。临终决定往生上品。纵根机陋劣。未证三昧。但以信愿持佛名号。如子忆母。常时无间。殆至临终。感应道交。仗佛慈力。带业往生。末世众生。唯此是赖。否则但种来因。难得实益。果能志心持念。念到全心是佛。全佛是心。心外无佛。佛外无心。无念而念。念而无念。心佛两彰。而复双泯时。则实相妙理。觐体显露。西方依正。彻底圆彰。即持名而深达实相。不作观而亲见西方。摄机最普，得益最深。最利末法钝根之士。大畅如来出世之怀。以故从上知识。多皆注重於持名一门。此念他佛之大致也。至於自他俱念。即所谓禅净双修者。有以专看念佛的是谁。以期明心见性。不以信愿求生为事者。虽似禅净双修。实为有禅无净。既无信愿。莫由仗佛力以带业往生。倘未到业尽情空地位。又不能仗自力以了生脱死。是知禅净双修。唯具深信愿者方能得益。否则固不如专致力於持佛名号一门也。净土法门。实为如来一代时教契理契机之特别法门。以故往圣前贤。人人趣向。千经万论。

处处指归。东瀛某某。节录诸经论阐扬念佛诸义。为弥陀说林。章分十门。理畅一行。可为修净业者之一助。范古农居士。特为校勘。改为阿弥陀佛圣典。用示尊崇之义。然其所录绝未叙明源委。待有暇时。居士必当依经详别。令一切人。知念佛求生西方一法。为一切上圣下凡共修之道。庶不至生自诩上根。不肯修习。并自委下根。不堪修习等过。排工将竣。令光作序。遂约所知。以为表白。须知念佛一法。乃十方三世一切诸佛。上成佛道。下化众生。成始成终之总持法门。如不见信。请质之普贤菩萨。

公元一九三一年辛未季夏常惭愧僧释印光谨撰。

阿弥陀佛圣典序

今世问题之大。莫大於人生。我不解人既生矣。而又成问题也。良以人虽生。而所以资生之道阙如。所以碍生之具炽然。此斯世之所以为苦也。

我佛出世。为解决人生问题。而首谈四谛。即揭苦谛。令人了解此世之人生。纵欲解决而不可得。然以大悲愿力。又不能置人生於不顾。於是说法四十九年。开妙法门。指归净土。净土者乐土也。乐土无苦。人生其中。光明无量。寿命无量。无生而生。生而无生。人生人生。不成问题矣。众生何幸。而得闻是法。亦何幸而得生斯土。世之日欲解决人生问题而不信此道者何哉。曰。此未读佛经之故。

净土法门。三经一论。稍习佛典者。莫不知之。岂知我佛一代时教。所说经典。举扬净土若依若正者。何止於是。致此解决人生绝妙法门。谓为无徵不信。成为难信之法。岂不可痛。我国净土宗师。往往以一句弥陀教人专修。而未尝与

之广谈圣教。虽间亦援引经论。不过数十部而止。要不若此弥陀圣典之揭出二百余经之多也。夫以我人之经历。竖不过数十年。横不过数千里。而欲知夫数千年前数万里外者。非以文字为依归。如之何其可也。而况弥陀净土。成於十劫以来。在於十万亿佛土之外哉。若谓此不过纸上空谈。纵极千经万论之指归。而犹不生信者。吾未如之何也已矣。

高居士观庐。般若根深。青年学佛。得日本净土真宗之传。赍其典籍来归。其中有弥陀说林者。集藏经中关于弥陀净土者无虑数千条。我阅之而大喜。曰。此可以示不信净土者矣。此可以教修净土而寡学佛典者矣。间有日文请其译转。而於经论诸文。又详加检查校对。以期与藏经无异。积二月之功。而稿始成。又复为之分类十章。条理胜於原书。乃易名曰弥陀圣典。所以尊经也。世之修净土念弥陀者。得此书而诵读之。其无数典忘祖之谓乎。又或未修未念者。得此书而浏览之。知弥陀因地之深。与夫果地之神。又见夫法门之广博。法海之渊深。有不油然而兴勃

然而起者乎。誠如是也。由此書而信淨土。念彌
佛。生極樂。證無生。謂此書為解決人生大問題
之寶典可也。然則此典之出世願不重要乎哉。今
書急於出版。引文過於簡略處。無暇纂修。以臻
美備。他日有暇。當再按本經文義。以補其缺。
俾單詞只句。悉有由來。長篇大段。咸明指趣。
是則所宜報告於讀者爾。

公元一九三一年仲夏之月范古農序於佛學書
局之編輯室

第一 赞叹归敬章

夫果德之殊胜。莫胜於西方。修行之简捷。莫捷於念佛。是以诸经所赞。多在弥陀。无量诸佛莫不赞叹。无尽菩萨之所归依。然则彼佛彼土之功德庄严。诚非吾人之所能测其无量不可说分之一矣。今兹所举。藉经中圣言以略示其概耳。实则本书全部所载。无非赞叹归敬之言。盖不仅如此章所述已也。

佛说大方广菩萨念佛三昧分

过去有佛名放光。亦无边方无量相。

佛说无量寿经

无量寿佛。威神光明。最尊第一。诸佛光明。所不能及。或有佛光。照百佛世界。或千佛世界。取要言之。或照东方恒沙佛刹。南西北方。四维上下亦复如是。或有佛光。照於七尺。或照一由旬。二三四五由旬。如是转倍。乃至照一佛刹。是故无量寿佛。号无量光佛。无边光佛。无碍光佛。无对光佛。炎王光佛。清净光佛。欢喜光佛。智慧光佛。不断光佛。难思光佛。无称光

佛。超日月光佛。其有众生遇斯光者。三垢消灭。身意柔软。欢喜踊跃。善心生焉。若在三涂极苦之处。见此光明。皆得休息。无复苦恼。寿终之后。皆蒙解脱。无量寿佛。光明显赫。照耀十方诸佛国土。莫不闻知。不但我今称其光明。一切诸佛声闻缘觉诸菩萨众。咸共叹誉。亦复如是。

十方恒沙诸佛如来。皆共赞叹无量寿佛威神功德不可思议。

无量寿佛。威神无极。十方世界。无量无边不可思议诸佛如来。莫不称叹。於彼东方恒沙佛国。无量无数诸菩萨众。皆悉往诣无量寿佛所。恭敬供养。及诸菩萨声闻大众。听受经法。宣布道化。南西北方。四维上下。亦复如是。

大宝积经无量寿如来会

东方如恒沙界。一一界中如恒沙佛。彼诸佛等。一一称赞阿弥陀佛无量功德。南西北方。四维上下。诸佛称赞。亦复如是。何以故。他方佛国。所有众生。闻无量寿如来名号。乃至能发一念净信。欢喜爱乐。所有善根。回向愿生无量寿国

者。随愿皆生。得不退转。乃至无上正等菩提。无量无数不可思议无有等等无边世界诸佛如来。皆共称赞无量寿佛所有功德。

阿弥陀三耶三佛萨楼佛檀过度人道经
阿弥陀佛恩德。诸所布施。八方上下。无穷无极。甚深无量。快善不可言。其智慧教授。所出经道。布告八方上下。诸无央数天上天下。甚不原也。其经卷数甚多。不可复计。都无有极。

大乘无量寿庄严经

彼佛利乐诸功德。唯佛与佛乃能知。声闻缘觉满世间。尽其神力莫能测。假使长寿诸有情。命住无数俱胝劫。称赞如来功德身。尽其形寿赞无尽。东方有恒河沙数世界诸佛如来。出广长舌相。放无量光。说诚实言。称赞无量寿佛。不可思议功德。南方亦有恒河沙数世界诸佛如来。出广大舌相。放无量光。说诚实言。称赞无量寿佛不可思议功德。西方亦有恒河沙数世界诸佛如来。出广长舌相。放无量光。说诚实言。称赞无量寿佛不可思议功德。北方亦有恒河沙数世界诸佛如来。出广长舌相。放无量光。说诚实言。称

赞无量寿佛不可思议功德。如是四维上下恒河沙数世界诸佛如来。出广长舌相。放无量光。说诚实言。称赞无量寿佛不可思议功德。

如是功德庄严极乐国土。满彼算数无量之劫。说不能尽。

佛说阿弥陀经

又舍利弗。极乐国土。有七宝池。八功德水。充满其中。池底纯以金沙布地。四边阶道。金银琉璃玻璃合成。上有楼阁。亦以金银琉璃玻璃砗磲赤珠玛瑙而严饰之。池中莲花。大如车轮。青色青光。黄色黄光。赤色赤光。白色白光。微妙香洁。舍利弗。极乐国土。成就如是功德庄严。又舍利弗。彼佛国土。常作天乐。黄金为地。昼夜六时。雨天曼陀罗华。其土众生。常以清旦。各以衣祴。盛众妙华。供养他方十万亿佛。即以食时。还到本国。饭食经行。舍利弗。极乐国土。成就如是功德庄严。复次舍利弗。彼国常有种种奇妙杂色之鸟。白鹤孔雀鹦鹉舍利迦陵频迦共命之鸟。是诸众鸟。昼夜六时。出和雅音。其音演畅。五根五力。七菩提分。八圣道分。如是等

法。其土众生。闻是音已。皆悉念佛念法念僧。舍利弗。汝弗谓此鸟实是罪报所生。所以者何。彼佛国土。无三恶道。舍利弗。其佛国土尚无恶道之名。何况有实。是诸众鸟。皆是阿弥陀佛。欲令法音宣流。变化所作。舍利弗。彼佛国土。微风吹动。诸宝行树。及宝罗网。出微妙音。譬如百千种乐。同时俱作。闻是音声。自然皆生念佛念法念僧之心。舍利弗。其佛国土。成就如是功德庄严。舍利弗。於汝意云何。彼佛何故号阿弥陀。舍利弗。彼佛光明无量。照十方国。无所障碍。是故号为阿弥陀。又舍利弗。彼佛寿命。及其人民。无量无边阿僧祇劫。故名阿弥陀。舍利弗。阿弥陀佛。成佛以来。於今十劫。又舍利弗。彼佛有无量无边声闻弟子。皆阿罗汉。非是算数之所能知。诸菩萨众。亦复如是。舍利弗。彼佛国土。成就如是功德庄严。

舍利弗。如我今者赞叹阿弥陀佛不可思议功德之利。东方亦有阿閼鞞佛。须弥相佛。大须弥佛。须弥光佛。妙音佛。如是等恒河沙数诸佛。各於其国。出广长舌相。遍覆三千大千世界。说诚实

言。汝等众生。当信是称赞不可思议功德。一切诸佛所护念经。舍利弗。南方世界。有日月灯佛。名闻光佛。大焰肩佛。须弥灯佛。无量精进佛。如是等恒河沙数诸佛。各於其国。出广长舌相。遍覆三千大千世界。说诚实言。汝等众生。当信是称赞不可思议功德一切诸佛所护念经。舍利弗。西方世界有无量寿佛。无量相佛。无量幢佛。大光佛。大明佛。宝相佛。净光佛。如是等恒河沙数诸佛。各於其国。出广长舌相。遍覆三千大千世界。说诚实言。汝等众生。当信是称赞不可思议功德。一切诸佛所护念经。舍利弗。北方世界。有焰肩佛。最胜音佛。难沮佛。日生佛。网明佛。如是等恒河沙数诸佛。各於其国出广长舌相。遍覆三千大千世界。说诚实言。汝等众生。当信是称赞不可思议功德。一切诸佛所护念经。舍利弗。下方世界。有师子佛。名闻佛。名光佛。达摩佛。法幢佛。持法佛。如是等恒河沙数诸佛。各於其国。出广长舌相。遍覆三千大千世界。说诚实言。汝等众生。当信是称赞不可思议功德。一切诸佛所护念经。舍利弗。上方世

界。有梵音佛。宿王佛。香上佛。香光佛。大焰肩佛。杂色宝华严身佛。娑罗树王佛。宝华德佛。见一切义佛。如须弥山佛。如是等恒河沙数诸佛。各於其国。出广长舌相。遍覆三千大千世界。说诚实言。汝等众生。当信是称赞不可思议功德。一切诸佛所护念经。

称赞净土佛摄受经

极乐世界净佛土中。有如是等无量无边不可思议甚希有事。假使经於百千俱胝那庾多劫。以其无量百千俱胝那庾多舌。一一舌上出无量声。赞其功德。亦不能尽。

金光明最胜王经金胜陀罗尼品

南谟西方阿弥陀佛。

又吉祥天女品

南谟西方无量寿佛。

大乘入楞伽经

十方诸刹土。众生菩萨中。所有法报佛。化身及变化。皆从无量寿。极乐界中出。於方广经中。应知密意说。

入楞伽经

若不生彼心。是第一义相。报相佛实体。及所化佛相。众生及菩萨。并十方国土。习气法化佛。及作於化佛。是皆一切从。阿弥陀国出。

不空罽索陀罗尼自在咒王经

南谟阿弭哆婆耶。

不空罽索神咒心经

敬礼无量光如来。

不空罽索神变真言经

敬礼无量光如来。

佛说称扬诸佛功德经

复次。舍利弗。西方去此十万亿佛刹。有世界名曰安乐。其国有佛。号阿弥陀如来至真等正觉明行成为善逝世间解无上士道法御天人师。号曰众祐。度人无量。若有得闻无量如来名者。一心信乐。持讽诵念。当起广远无量欢喜。安立其意。令使真谛。十万亿信心。念斯如来。其人当得无量之福。永当远离三塗之厄。命终之后。皆得往生彼佛刹土。命欲终时。一心信乐。念不忘舍阿弥陀佛。将诸众僧。住其人前。魔终不能毁坏斯等正觉之心。所以者何。其佛世尊。兴立大悲。